


0
1cm
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28



浙江圖書館



浙江圖書館



浙江圖書館



浙江圖書館



皇明名臣琬琰錄卷之二十二

瑯琊

王世貞

續編



東里邵公暨配恭人合葬墓誌銘

提學副使盧君墓表

按察司副使葛君墓誌銘


按察司副使劉公行狀

按察司副使諸先生墓誌銘

按察司副使惠公墓誌銘

提學副使陳公墓誌銘

洞陽顧公墓誌銘



崔銑

江曉

張時徹

皇甫汸

按察司副使閻公墓誌銘

許魯宗

楊西渠公墓誌銘

王慎中

嶺泉胡君墓誌銘

羅洪先

提學副使金公墓誌銘

洪朝選

提學副使陸公列傳

張時徹

浙江圖書館

中憲大夫陝西督學副使東里邵公暨配恭人

墓誌銘

呂本撰



吾邑以德行文學表見於時躋穹齡而裕後昆者東里邵公其一焉乙巳秋本視篆留院便道歸謁公公尚能儼然用旋為本道親故不倦本謂公其長生者乎不意別未幾而公仙逝矣老成云亡後生安仰豈惟我親故者之傷士類莫不嗟歎云公之孫六合令漳以本能知公請銘諸公之墓本不敢辭乃序而銘之公諱蕃字文盛世家吾姚東南隅族屬繁衍先後多顯達人不能具載父驕母韓氏公生而魁梧偉特有奇氣學步語時迥然不羣兒同三歲失

怡知悲哀事繼母潘氏能竭力孝道六七歲便日抱墳籍
依以為學過目輒成誦是以學無所不通尤深於禮經年
十二為舉子業通三場聲名籍籍以起老師宿儒莫能與
校得失年十五督學張公試諸生首取公八邑庠自是每
試必居首無能易之者成化癸卯以禮經舉於鄉明年甲
辰登進士第知建平縣建平窶而蔽民甚凋瘵且訐訟滋
蔓吏緣以為奸號難理公至早作夜思務求安輯之道乃
清以律已公以御物惟茲有利罔不興惟茲有害罔不除
衆廣悉蠲羣情大洽六年而政績顯著薦剡交上皆曰江
南治行第一光祿馬公去思碑記頗詳也弘治癸丑年行

取授山西道監察御史公益秉義奮忠毅然有澄清之志
矣於是巡醜長蘆則貞肅憲度搜剔蠹弊言利歸於國商
稱其便者莫加焉於是督學北畿則嚴立規條崇文興行
言公明兼至科第得人者莫加焉戊午年丁父憂辛酉年
起復補四川道是年又丁繼母憂甲子年起復補廣東道
乙丑年監會試所在踐職綜務厥猷融茂丁卯年陞陝西
督學副使表正化導如在北畿時查革民人冒名援例生
員他邑補廩皆不避權貴為之逆瑾興平人絕不與見銜
之戊辰年吏部推公擢四川左叅政瑾從是疏中令致仕
瑾被誅而臺諫交章薦公如巡按御史劉公天和都給事

中張瓚皆以公抗奸去國志烈秋霜矣宜亟叙秩時揚公
一清為冢宰以公代已督學時頗更其事謂形吾失也衆
䟽竟寢不復起士論惜之公蓬戶篳門䟽食飲水數十年
終日危坐一室間讀書談道之外一毫不與焉知與不知
者莫不嚮往之郡伯張公敦請至郡為鄉飲大賓時年老
矣八邑之人多來觀者雖麟鳳之瑞不是過也其仇之沮
之者何在哉公孫漳高才稚望足趾公羨嘉靖癸卯以禮
經魁於鄉明年甲辰登進士第知六合譽赫然皆如公其
遠到更不可量公得親見其後之賢若此天之報公者又
豈不多耶公生於景泰癸酉六月十一日卒於嘉靖乙巳

十一月二十六日享年九十三歲兩奉詔進階中憲大夫
配陳氏贈恭人方伯陳公雲鵬之女陳公愛其女必得竒
才歸之所見士無有當其意者聞公名願得一相見試以
論策數篇公援筆立就造語構思皆精妙驚人陳公踴躍
而笑曰其吾女之幸乎遂嬪于公恭人婉孌貞淑入門而
媪御皆嘉既饋而公姑交賀公未遇時嘗躬紡織親井臼
不自知為方伯女俾公專心於學不以家務累事繼姑潘
氏孝敬兼至公一妹二弟皆潘出撫恤優厚尤得舅姑歡
心公既顯恭人操持儉約如昔綺繡珍麗之服終其身不
復用每見公清介淡薄不特中心欣然必舉以勗諸子真

可謂媿美合德者矣恭人生於景泰丙子十二月二十四日卒於正德癸酉七月初十日享年五十八歲生男三長時健南京中城副兵馬娶方伯王公女次時順山東臨淄縣知縣娶蕭山憲長來公女次時宜生員娶郡伯陳公女女二長適方伯華公子文次適太傅謝文正公子豆孫澠生員淄時健子漳時順子潢澐生員時宜子澠子夢暘漳子夢桂夢蘭夢松潢子夢龍皆其曾孫云恭人先塋于馮村山之陽今年某月某日將奉公柩啓壙合葬焉銘曰
喬嶽東峙大江西來融結網緼竒特胚胎飛騰天衢涵泳
聖涯屢握憲綱再振文教抗奸忤權守節善道肥遯林泉

優游耄耋老淑哉恭人婉美于公行隆四德賢著九宗顯榮
有赫流慶無窮莪莪馮村天啓佳域式歸其全蘊此雙壁
我銘諸幽以至千億

浙江圖書館



浙江圖書館

明故四川按察司提學副使盧君墓表

卽寶

監察御史盧君師卽既擢四川按察副使奉 璽書提督

學政取道省其父 封御史某庵公於吳將行暴疾而卒

又明年癸未封君以其子應圻墓之於西橫山之原某官

某旣為之銘又明年甲申其弟兵部主事師陳以使事歸

乃立石墓上以其所自為狀請予表之予昔請養歸之三

年屢得先師文正公手書稱君之賢時君方為御史公致

政家居數相從論議比公薨而君以四川巡按過錫予始

得相見師陳繼脩君好及提學再見方約會于山中乃愆

期數日而訃至矣予方恨一第之缺今見師陳如見君也
其能已於表乎予嘗聞今之君子之論君也由其言於上
者謂之貞臣由其行於下者謂之才臣由其潤於身而表
章乎古人者謂之文學之臣吾徵之狀君初登進士而觀
政都察院也於群衆中獨留心吏事凡章程法比皆習而
通之時都御史三山王公見其所擬吏牘驚曰此法家言
老吏所不及因薦試河間道御史巡西直門繼巡東城於
是武宗方銳意北狩督宣府建行宮急而都御史某附
麗承望其勢張甚君上疏請罷行宮之役而斥某邦穢庸
劣不宜任用言極激切廷中聳然比既實授清戎至東光

見長寧伯某侵奪民田橫歛子粒往往逮繫死詔獄君上
疏極論請釋無辜而還其侵地皆從之或言長寧貴戚權
倖君清戎有職何得出位君曰風聞言事御史職也况目
擊其事何可忍也巡按初至四川首劾巡撫都御史某某
陰附當路黷貨殃民莫敢指斥後雖坐他事逮黜亦以君
言故由是一方肅然人謂得巡按大體是故謂之貞先是
巡城者務繁科條以鈎摭為能所關決多家人細事君曰
御史所治止是邪悉縱不問所治惟宿奸臣蠹要束詳明
發擿敏利譽籍籍起河間早奏請免賦減科隨盡出所儲
臧鏹貸民全活甚衆四川地遠懼獄之久淹也檄所司月

報而時遣發之朝使方取材西南又邠人迎佛亦道境內
屬歲飢民不堪供輸君材擇周慎而晝夜拊循之民得不
擾妖人甲善幻術能剗腹出腸胃喘人徼利又能吐火燒
民廬室民益驚畏求罔不獲或捕之輒說校以逸殆不可
方物君密飭各郡同日邏捕術窮皆伏其辜某郡人乙慄
悍強禦推埋自恣君虞其陰賊多黨援急或生變乃先揚
好言卒以計擒殺之捷為之墓顧灘溫江之三渡皆湍急
善溺舟君擇材幹吏委以鑿治人知其去險即安而不知
勞費是故謂之才君天資有大過人者性尤嗜學平居手
不釋卷程文若擬古詩詞清潤圓融不事刻削而新意層

出少受知於太保吳文定公太傅王文恪公都御史瓜涇
徐公八朝尤為太師李文正公所喜有相見之晚之嘆
所著有方舟聯舫二集及奏疏詩文總若干卷藏于家按
治所至以餘力建學申教太興文治薦起賢士大夫不可
起者必造其廬禮焉死者弔祭其墓尤樂表章先賢嘗建
董子毛公二詞及浣花三陳東坡遣直四書院家居時請
立石湖書院祀宋范文穆公又求其遺像及所書田園雜
興手摹勒石其中以文穆故居湖上君與鄰焉用是致景
行意遇古蹟及山水奇勝處多所題詠是故謂之文學夫
三者有一已為人望而况兼而有之乎且貞而不過濟之

以敏才而不浮持之以重文學而卒歸於稚將之以德蓋
不惟成章而已殆知所以裁之者故雖未見其止即其所
至亦可以稱於天下矣君諱雍字師邵某甲子舉於鄉登
辛未進士凡在官若干年卒是為正德辛巳九月九日年
四十有八娶薛氏 贈孺人繼張氏 封如之子一人即
應圻女一人適陸希夔盧氏系出范陽世居蘇之崑山五
世祖吉仕皇朝為青州通判自崑徙吳縣越來溪上歷四
世至士誠士誠子即封君諱綱有學行為士夫君子所重
師陳於君有師友之義故為之圖不朽者甚勤吾於是乎
感焉因并書之

陝西按察副使葛君墓誌銘

語曰長筭屈於短日嗟乎功必次而弘時才必久而累績
故人直多艱靡拒天損古志士深悲之吾磁葛延之父操
廉蹈勤約已奉國而官副使年五旬卒已夫其抗志踐古
展蘊立名期而勵者將若何而極也磁又有御史王泮忠
清乃延之伍亦早死悲夫吾鄴生尤丁天損之虐邠延之
諱覃祖玘父義母王氏嘗封郎中及太宜人延之明朱詩
正德甲戌舉進士令樂清三遷官至南京戶部郎中守平
陽乃憲陝西延之有治存理簿書結囚要精明立可辨吏
不得為奸在樂清堪輿家言建署背吉地故令無選官者

宜改治延之不從減武官濫役民遭其構不動在平陽辟
盧生又辯其屬之誣皆忤上官蓋其操廉無可指瑕故遇
事斤斤執典天性簡言笑交游每日競競律身恐越繩墨
論者謂宜濟之弘裕然循其習性無變配張氏亦封宜人
五子逢春逢夏逢時逢吉逢辰一女嫁張涵延之以嘉靖
甲午九月二十三日卒生于成化壬寅正月十四日逢夏
為群學生著名塲屋間將以乙未十月望葬其父余受託
銘墓乃法先漢賢士文體簡存要略且續鄴乘銘曰 彼
庫撲檄乃材夏屋胡短轅者大服四馬葛生履屨甫投伊
廓而返冥冥疇堅已約往恤人瘼而聞曄曄而石截截而

詞揭揭永登白潔



浙江圖書館

崔銑撰



浙江圖書館

陝西按察司副使劉公行狀

公諱從學字時敏別號屏山生有異質方解語即好誦書
不與群兒作俗戲成童隨先大父之金縣俸資且廉薄公
竭力奉甘旨而自不厭粗糲暇則日誦千餘言先大父竒
之始教之作文即領大意後先大父謝政歸田適督學濯
菴馮公會考公為首遂登正德丁卯省薦試禮闈弗捷業
大學己卯秋銓兵部司務公嚴以督責群吏勤以註銷公
文嘉靖甲申適廷臣議大禮各䟽力爭公奏曰義隆正
統情盡本生頌之 詔令 聖心亦既慰矣柰何欲去本
生之稱非先王之禮啓後世之議豈不為 聖德累乎奏

入留中公復奏曰本生二字何違於禮何損於孝去此二字則援立之恩繼統之義泯而無存矣奏入復留中朝罷上齋居 文華殿金獻民徐文華倡言於衆曰昨諸疏留中必欲改稱 孝宗為皇伯考則大廟無考 正統有間矣何孟春曰 憲宗朝禮部尚書姚夔率百官赴 文華門跪哭爭論 慈懿皇太后葬禮 憲宗從焉此 國家故事公倡言於衆曰 國家養士百五十年伏節死義正在今日乃遽留諸 朝臣於金水橋南曰萬世瞻仰在此一舉今日有不力爭者當共擊之俱赴 左順門跪伏聲徹於內 上命司禮監官諭之曰此禮 朝廷自有審處

群臣咸曰必得 俞旨乃退及午撼門大哭聲震 闕廷
上大怒械繫而 廷笞之丙戌春陞戶部員外郎行查京
庫及九門錢鈔時與內官同事公守已清慎執法不撓吏
部考績曰才識宏深性質謹厚閱歷寢深聲稱愈著丁亥
春陞郎中奉 勅總督遼東糧儲閔防慎密餘銀分毫必
記於官一時宦遼陽者如張公問行陸公杰麻公循咸服
其老成戊子冬奉 旨九年考績赴部吏部考曰歷部官
而謹慎不渝總邊儲而經畫有方都察院考曰守已慎而
無議督儲公而有方己丑春復補廣東司郎中庚寅冬得
給 誥命辛卯乃奉 恩旨焚黃祭墓烏紗珠翟輝映桑

粹士辰陞陝西布政司叅議分守隴西道及過先大父舊
治金邑父老擁留之隴為西邊陲郡地瘠民貧公澹泊自
甘束薪粒米不取於民州縣官不得以私謁伸寃理枉付
之公道俸入之外取一錢規矩之外行一事斷乎不為也
臨鞏地方大虜壓境犯邊攻墩公督率官軍追勦斬獲首
級奪獲達馬夷噐奏聞上嘉之欽賞銀十兩紵絲
一表裏時嘉靖戊戌也鞏昌府同知李暹口稟站價餘五
十兩送本道公用公叱之曰朝廷錢糧自當作正支銷即
時付府守寇子天與作正支銷訖丁酉歲轉按察司副使
奉勅整飭甘肅兵備抵任豪橫斂跡邊境安堵不逾載

有歸念移檄撫按公遂浩然而歸官軍哭號遮道至不得
行時閑住叅將芮綱餽五十金公令千戶揚錦卻之視
四品之秩不以為貴二千石之祿不以為富棄歸林泉飲
水甘於列鼎溫袍榮於華袞既抵家山林寄傲不邇公門
昔與舊耆遊錦屏山詩酒款洽葆光頤神公立朝端奉
公秉法在藩臬守正不阿先年急流勇退晚歲守靜家居
自居官素履以及退休林下終始完名無少玷缺嘉靖甲
子秋仲偶感疾疾卒壽八十有二云

浙



浙江圖書館

明中憲大夫貴州按察司副使仕亭材諸先生墓誌

銘
備

往余童子時每從湯先生霽胡生逢造亭村先生歸未嘗
不克如其有獲也今二君之墓皆宿草矣其又奚忍復銘
先生墓哉悲乎悲乎先生器宇清朗健談辯時出詼譎工
於詩辭不矯不附不矜瀆其接厚利也若志其處蓬華若
大厦也以故人無少長咸尊禮之云嗟乎余蓋遊縉紳間
見縫掖之士為赫赫者尚威而寘惠慕皦皦者喜譽而亡
實或乃攘華要以自利怵巨貴而劫於勢者嫉媚縱弛鮮
有立矣至其下者揣摩機識忍蒙詬詈博巨資以利永乂

盱眙罔上而不足齒焉先生初令兩邑內歷曹署外鎮藩
臬未嘗好近名務矯飾詘勢遺利而所蒞咸著聲績其舉
進士也與今閣大臣貴溪公同年雅相好也先生出僉福
建貴谿公張祖都門其擢饗州也謂銓司揚某曰諸某者
雅秀人也豈宜以西南荒裒居之哉余聞之回附訊先生
竟不荅也是其人矯然雲泥之外豈以夷險非美殊志者
乎既乃見幾勇止內無絳綬歸居東鄙之外舊廬蕭然不
問產業日與其所厚善徜徉山水觴詠為樂劇談古今琅
琅傾聽性又善攝好外家傳語或無賓客則靜坐偃息時
延黃剝叩玄秘說化術不營營為子孫計人謂其近神僊

人即期願無論也而年僅踰六十豈脩短之數固非所諳
哉按狀先生姓諸諱侮字揚伯號亭村子上世由宋汴來
徙紹興已六世祖壽徒嘉興遂為嘉興人壽生安安生貴
覺生士明生忠為梧州守梧州生四子仲子敷好讀書通
陰陽家術余童子時思之贈按察僉事寔生先生云先生
幼孱弱多疾然即有志槩年弱冠盡通經史百家言補邑
弟子負令譽籍籍中正德癸酉鄉試丁丑舉進士授黃梅
縣令黃梅素多桀難治令至者輒相繼罷去蓋未嘗有三
年終者也時值宸濠構逆兵士仰給縣官民罷遺餉多就
亡匿先生摧抑豪右撫循疲弱亡者稍稍集越二年以父

制去任起改大名縣大名為王畿輔邑士風淳龐因俗而

治不事紛擾民至於今思之丙戌徵為刑部主事丁亥丁

母周氏艱庚寅起復主事進員外郎尋陞福建按察僉事

啓弊剔奸覈理

屯政 屯政

盡舉丁酉擢貴州叅議貴土官遇上官

至例輒有餽先生卻之一錢不受有安宣慰大酋也法當

承蔭然非預業賂莫敢請先生知之即為判牒此其服庶

守介雖子罕之卻璧勇安之揮金何以尚之越二年擢本

省按察副使持明懸平輕重咸適平反之家有繪像祀先

生者於是吏憚而縮民恃而舒夷怵而震知先生之不可

以罔僖矣然而遇事不私無所阿比或悒悒不自悅辛丑

春竟上書乞致仕怡怡然若舉重負而釋之也先生居常
無愠容亦無惰色不畜姬媵樂與後進雖卑幼有過不面
斥之諷之使改而已有二叔者貧無嗣也事之生死盡誼
雖古之篤行君子何以加諸即使徒唯唯致位鄉相奚足
多哉先生生成化丁酉卒嘉靖癸卯壽六十有七配俞氏
累封宜人子一夏庠生娶馮氏繼顏氏女二長適周于德
次適張桐孫男三鈺聘包汴女鈺聘鄭鑾女錕聘陳詔女
孫女一許聘沈茂完子夏卜嘉靖乙巳年十一月十三日
壬申塋先生於永豐鄉祖塋謁余為銘銘曰 名以德永
不可謂短業以行著不可謂蹇身沒而聞存不可謂靡遠

嗚呼先生上壽雖靳積則有餘崇丘巨澤實生璠璣嗚呼
諸氏亦熾其貽矣



浙江圖書館

江西按察司副使惠公墓誌銘

江曉撰

嘉靖辛丑夏四月十有二日江西按察司副使北屏惠公卒秋八月二日厥子庠生政衰經詣予泣而言曰政弗數弗克嗣服以為先考光顧懿而弗揚非孝也惟舅氏有夙契焉盍銘諸予曰怒哉昔我先考文昭公在詞林世考秋岷公貽書謂姊氏笄矣盍為相攸時公執經于司諫夏公之門見其質穎而章粹也俾納采焉越至于今五十年媿誼孔腆矧公耆德為鄉邦望予茲明農方是瞻是式胡晤不再期而幽明永隔也能無感乎乃按厥壻國子生張文

敬所述狀而叙之曰公諱隆字從道北屏其號也公幼失
怙恃賴繼母撫育稍長即有亢宗志博極經史尤潛心于
易孝廟初以厥兄祥世業琴徵拜鴻臚寺丞公奉繼母携
幼弟鵞從兄于任師友講習學日以裕弘治壬子舉順天
鄉試癸丑會試時文僖斬公閱其卷曰氣昌詞偉奇才也
用寘亞魁遂登進士第尋以姻乞旋而姊氏嬪焉乙卯授
刑部廣東司主事分治禁衛公勵精法律剖決如流獄無
寃滯己未進廣西司員外郎壬戌進陝西司郎中丕蔽要
囚益欽且慎時山陝宗室縣令構訟累歲不決公奉勅往勘
立為剖斷時謂平允事竣旋大司寇毘陵白公烏程閔公

咸雅重凡獄經公訊讞不復詰寃方留俟內陟時逆瑾勢
方熾公剛直不阿欲外補以避之正德丁卯擢守永平平
盧古雄鎮民俗勁悍公以嚴治發奸摘伏植弱鋤強政令
一新邑民張英田常戍諸途事久未白公廉得其情亟捕
而麗于法時中監擅權使遼左者絡繹于境謂郡有賢守
烏莫敢需擾民賴以安且修孤竹廟建昌黎祠以崇祀典
於是察有循良之稱已已以巡陳公旌薦移守寧國宜寧亦
古巨鎮民俗囂靡公治如永平而加詳烏咨民瘼祛吏弊
別淑慝覈徵賦清訟獄庶政畢舉宣城有金堡圍洪水為
災民多艱食則發廩給粥以賑之所活幾數萬民用懷之

為建生詞旌德有劇盜繹騷民心震恐則簡銳卒厚賞
犒不旬日而就擒民有寧宇且梓謝玄暉詩樹文天祥石
記表章諸先賢義烈祠守以厲風化於是有去思之頌庚
午擢江西按察司副使江西民俗競訟公素諳法律一訊
而決故署篆督學政釐水利憲度貞肅時宸濠逆謀未露
而脅權附勢寔繁有徒不懟不竦悉繩以法罔貸姚源巨
盜猖獗巡撫中丞王公知公才畧以兵委焉公運籌制勝
擒厥酋而顯戮之民用救寧於是有保障之譽公歷官中
外幾二十年所至以治績顯時有公輔望辛未甫踰強仕
即以正足為戒忽罹誣搆遂解組歸家居事繼母以孝敬

處昆季以友恭迪子姓以義方督僮僕以藝殖且營別墅
于所居東許茅亭花榭極幽雅之趣凡親友過從款洽無
厭至以私干則峻拒之故自謝政以至垂老足不履公門
口不談世務暇則與樂間吳公輩為鄉約五老歸田會登
眺湖山以永觴自娛遠近唐香山宋洛社之遺矩繪圖梓
詩以傳用樹風聲于茲鄉邑時乃休郡守廉其誼延以賓
鄉飲輒辭至章丘李侯懇請強而就者一自臺省以至郡
邑罔不雅重饋以薪米勞以羊酒者至再至三非耆德其
曷以致是是固鄉之望也咸以上壽期之居無何痼疾日
劇而遽易箒焉其疇不盡傷豈惟媼族厥肇生于成化己

丑正月十九日越至于今七十有三年惟姊氏克相克震
用遺後人封冝人子男二長即政次教亦庠生早卒女三
先是公營壽藏於積慶山祖塋之次政等筮以十月初三
日扶襯往窆焉是故銘而賁諸幽禮也銘曰燁燁碩宗南
國之紀奕世載德以濟厥美顯允維公洵毅且弘陟科躋
仕有俶有終時行斯行時止斯止消息盈虛卒惟易理厥
行維何折獄致刑自牧徂憲庶績用成厥止維何見幾而
作林壑優游以莫不樂且樂且康以篤其慶遯亨履吉式
是鄉邦鄉邦作式厥行靡忒子孫繩繩於昭燕翼知存知
亡卜兆孔臧章潛閔窆永世其光

河南提學副使陳公墓誌銘

張時徹撰

昔後岡陳君之歿也余嘗為之傳凡累千百言蓋傷其懷
竒負特不少試見賚志以歿云子時猶幸三孤之遺也謂
宜有長茂以紹延休緒未幾輒殞其一今言忠與其婦又
將繼死也悲夫方言忠之屬續也舅氏董約山適來自留
都集予一二親故為之立後析產經紀後事遂以塋屬予
曰後岡所存一家遺骸耳非公不得歸於土雖然不有墓
門之石則兒豎將日游乎其中牛羊又從而牧之惟公哀
憐之余盡然流涕曰嗟嗟陳君而一至此乎昔之言天者

虧盈益謙福善禍淫且謂不于其身必于其子孫古今載
牒其已事足徵焉故論篤君子往往指數以為修行之勸
而今廼若此也天可知乎天可知乎初後岡之童也轍自
見瑰特譽流縉紳間特少宰中峰董公亦自竒其女不易
匹偏擇才秀異等者一見後岡大異之輒字焉弱冠遂與
計偕策進士高第八翰林讀中秘書乃盡覽墳索及諸子
百家言又精古文詞視時輩若齷齪不足與伍者以此頗
自引重譏薄高貴人性亢潔自嫉惡嫉媚高貴人有欲款
引終不一折節其門積久深心嫉之而儕輩亦多姍螫遂
出為湖廣按察司僉事分司辰沅蓋困之也已乃移福建

布政司叅議又移河南按察司提學副使亦稍稍陟矣諸
媚者謂後岡獨能負氣翫駭持虛言彈刺必不肯抑心厲
志精會計聽斷修舉吏事逮其敗即擯之而後岡顧獨能
抑心勵志精會計聽斷益舉職終無詞罷免凡素所交游
咸竊嘉相謂以為後岡不器如此也嘉靖庚子竟以攷瘁
致疾嘔血而卒季僅三十有餘耳余時忝東藩哭而誄之
曰於乎陳君以苦其才使天假之年得依日月之際必當
表羔羊之節而耀金石之文揚雄王褒之徒可企而及也
廼至終抱按劔之悲而憤恚以死悲夫子男二言忠言信
後岡歿三年而言信故又八年董恭人亦故言忠娶寧國

知縣柴應賓之女乙卯五月舉一女甫四月餘而柴氏故
是年十一月九日則言忠屬續之期也後岡名東字約之
系出後龍陳氏高祖曰完鍾廣東鹽課提舉完鍾生瓊瓊
生鑰鑰生福建叅議濂鄉以後岡贈官娶戚氏封恭人生
子三長曰模次曰東後岡其季也模生性性生宗憲今為
後岡後云協議者約山董君與兩疇梁公葑崖周公東明
范公柴子子振而兩疇與子振則懇予為之碑卜以丙辰
四月九日葬于姚黃畬之陽銘曰訊材而不壽孰仁而斬
其後吁嗟天乎余將焉扣先民有言造物忌名無亦惟是
之咎乎

明中憲大夫廣東提刑按察司副使洞陽顧公墓誌

銘

皇甫沆

洞陽顧公卒之明年季子啓東暨冢孫道洪持其外姻秦子滂狀來乞銘余國之棄臣也雖嫻於文

辭烏足以鐫金石揚芬耀哉先是其死惠崖公之墓屬余表之獲詳世裔茲覽狀典而有徵因述其言聊為緣飾之按狀公諱可久字與新別號洞陽昔越王勾踐封其庶子於顧因以為氏其在錫者則自晉叅軍凱之始也明興有福五者卜居邑之膠山鄉公之高王父也力田畜藏家累千金時鉅猾俞寘逞暴作姦福五率其子壽山召義旅

過之寘懼乃潛奔京師飛文誣詆父子並逮繫久之寘乃
服辜始蒙矜釋歸則盡喪其貲矣壽山子諱信尚在齠齡
賴友人錢氏為魯朱家得不死長從賈人往來吳門稍稍
復其家業是為誠軒公後以兄榮僖公貴贈柱國太保禮
部尚書公之王父也生三子季諱榮章號筠以公貴贈中
憲大夫泉州知府娶李氏而生公中憲父嘗與芹軒伯氏
草堂仲氏各訓誨其子每曰吾家本江東人望纓綉蟬聯
安可不思光昭先德而守田舍翁哉由是諸子克遵義方
伯氏子可學即榮僖公仲氏子可立是為叅議公相繼登
進士筠軒頗鞅鞅不豫公曰富貴要各有時大人第少安

毋躁焉知後羽一舉不凌前翼冲霄耶歲在癸甲果連第
拜行人時 毅皇帝將南狩偕同官江右熊軾山西孟陽
泉南張岳洛中熊榮輦上書請留畧曰 陛下輕萬乘棄
九重忽垂堂之誠而甘馳駿之遊縱不自惜如宗廟 太
后何 上怒詔獄廷杖之左遷國子學正尋以父憂去位
值 今上入繼大統首錄諫臣
擢居瑣闥而公尚在苦塊未承江恩命亦數美癸未免喪
起家銓曹將擬前授而錫尹暢子素不悅公亦應召在京
陰譖沮之竟拜戶部員外郎時追崇 獻皇議起羣下聚
訟未有折衷公從同官後上䟽與張桂二公殊不相協復

詔獄杖之闕下幸不奪官乃有 徽藩冊封之役昔在行
人有 榮善王弔祭之役兩奉展親而君命不辱兩遭笞
點而臣節不渝君子以為難丙戌出知閩之泉州以母老
乞養疏上不報歎曰古人迴馭獨何心哉強承郡檄而泉
俗素好噐訟且怙勢相傾至則作六條以與民約旬月多
回心嚮化者公之折獄也務在得情而發摘不以為神故
民無寃者公之恤突也賑貸有方而矯制不以為嫌故民
多全活者至於興崇學校獎拔士類尤多意為庠生王以
寧兄弟就僧舍讀書蒼頭與行者忿爭輒撲殺之株連兩
生公一訊出之止坐歐者以寧是秋舉於鄉故士多感激

奮發由戊子舉者凡二十有八人上應列宿皆公造也若
余同年荏用賓蔡克廉並以高第顯名僉曰泉守知人哉
三載考績上方留意元元求所謂良二千石者八為公
卿銓曹察吏治無出泉州者將以太常卿召之客有止公
行者曰吾母老矣忍使不沾寵命而徒為身計乎乃就考
得上最母封太恭人帔霞簪翟亦榮矣亡何母卒歎曰向
使從客言不抱終天之恨乎甲午免喪起家補贛州當閩
廣荆楚孔道商醜往來例權其稅以充督府軍需墨吏并
農販征之公至白罷之贛民稱便甫三月擢為廣東按察
副使民泣曰天不佑贛遇公之晚柰何不能借公如寇恂

也瀕行主藏吏邀公視其醜羨將以德公乃斥之曰昔屬
令有餽吾幣於途者謝而遣之汝不聞耶三年無染於泉
三月歆汚於贛棄其前操戾之甚矣贛民至今以為美談
公自念兩守劇郡年資特久僅膺常調復領遐陬兼之備
兵瓊海颶風瘴霧意不欲行少宰霍文敏公廣人也移書
趣之不得已褰帷露冕徃蒞其境飭法振紀宣布威德黎
民惴惴罔敢犯者間乃按行諸郡咨詢黎倭出沒之處相
其阨塞險阻而為之備禦繪為圖說松林石坂不假躬登
絕島中盤宛在心目雖充國之畫金城文淵之籌函谷不
是過焉未幾羅活崗黎出劫為盜按圖循跡遂窮治之儋

厓諸黎五十二部落聞風款附境內帖然前此未有也以
公之才晉陟卿貳如漢故事奚所不可竟以讒免惜哉萋
斐成貝錦之嗟蒼苒起懷珠之謗皎行易汚流言難察類
如此矣昔泉有丘侍御者縱其家奴搏人於監司之門公
按以法雙江聶公持節按閩猶不能奪使憲臣如公則王
者三尺法有不信於天下者哉觀其齋空囊而度大使之
嶺題數語而謁曲江之祠此與投犀沉水取石逐舟者奚
異其免官還家也杜門却掃絕交當世屏跡公府慶弔之
外雖讌會亦不多預時汎舟梁谿之上振策惠山之陽以
取適而已性好讀書至老不倦尤好染翰作鍾王書盡得

其髓文必根理不襲陳言尤工於詩解褐即與薛考功蕙
鄭戶曹善夫談初耽李杜乃撰體畧晚醉右丞爰輯詩說
唐太史評公詩有幽深之思多自得之趣當矣所著有在
署讀禮溫陵處州珠崖在澗諸集并賦贊誌銘序記若干
卷藏于家瓊管所纂山海圖說迄今用之輒效傳為軍中
指南云丁巳偶感風痺尋差謂長子起孝曰汝才宜繩吾
武累試不第亦命矣曷就選今吾見汝衣冠也至京授鴻
臚署丞暴卒京邸公得訃悼曰使吾子不克殮形牖下吾
過矣因慟疾發不掇而卒情具哭子詩中邑人聞而悲之
歲癸亥正月某日堪輿叢辰家並曰吉圖舉公柩葬於小

嶺灣之新阡啓揚王二恭人兆合焉禮也公生成化乙巳
十月廿日享年七十有七配陽山楊氏贈恭人繼武進王
氏封恭人子男三人長即起孝鴻臚署丞次啓予國子生
次啓東縣學生孫男十一人曾孫男八人云 系曰今士
之仕也孰不欲優游以取卿相哉然有至不至者命也與
其貽韋晞寵於世孰若玉碎而垂身後名哉如洞陽公能
蒙垢遺榮殆無憾矣是宜銘 江矯矯憲臣際風振翼抗
疏繩違越俎秉直分陝樹聲為邦流澤口可鑠金心匪轉
石我有忠信孚干蠻貊亦有子孫遺之清白惜哉棄捐胡
然奄忽經始嶺灣卜云既吉爰啓新阡迺安幽宅考德懷

真請視鴻刻



浙江圖書館

三卷

廿日

以建五

中憲大夫浙江筭處提刑按察司副使閻公墓誌銘

許宗魯

嘉靖丁未五月八日中憲大夫浙江按察司副使北泉閻
公卒先時歲丙午夏公偶病肺及秋乃失音藥之弗愈延
引挾歲病益甚然尚遊燕自若卒之前月晦燕於文苑公
居上賓是夜病乃大作月朔疾革某往候於榻公執手囑
曰凡病肺者惡背寒余背寒二年矣且金被火尅夏中火
王余必不起余宦無羨資子所知者治喪當從儉葬俟田
入之積以襄其母亟枵孤且弱子其視若子惟是先兆窪
罅多潦余志欲改葬而未能也其為我卜善地以為我宮

惟余平生之事子習知之子為我銘某見其神志不渝語
論不謬勉以服食公笑曰漢高帝真英雄也病不嘗藥委
心俟終余生人之事畢矣今若此更何藥為某乃掩泣唯
諾自是日候其左右又三日晡氣升不降精匿不耀公乃
命衣冠於是裹中納履加衣束帶如常時既乃攬鏡正冠
捋鬚就坐若對賓客者明日出就正寢設榻而臥凡諸親
故省視皆與之訣日亭午坦然而逝距其生成化甲辰七
月十三日涉世六十又四年耳某與其棺歛哭而嘆曰嗟
嗟北泉生既簡直死復正靜觀其垂盡之論尚慕漢高其
中蓋有存王者矣嗚呼偉哉丈夫豈易能也明年戊申子

月之朔子枰葬公於漕渠東原之新塋以王安人祔某為
志曰公諱溥初字克周後更字公父其字世居興平之馬
嵬其北有泉流澤遠潤取以自號志不忘本也初公之祖
方伯於浙公實生焉既乃從其父宦京師四歲而孤方伯
公歸居長安城中而故興平人也成童有異質方伯公愛
出諸孫謂當繩其武弱冠學成受知於學使虎谷王先生
弘治辛酉為西安府學生員正德丁卯以尚書中鄉試六
試禮部嘉靖癸未登姚涑榜進士乙酉授刑部河南清吏
司主事己丑晉雲南司員外郎是冬再晉河南司郎中辛
卯陞直隸保定府知府甲午陞浙江按察司副使明年乙

未被論罷歸公初舉於鄉年才二十又四後屢困南宮復
值家替方其居大學時閹人劉瑾竊弄政權公為同邑人
或勸其速化公厲色揮謝退益淬礪講學授徒處貧而樂
後卒取上第語人曰是以成吾先祖之愛也其在北部研
精律例鞫訊不苟原情附律當可而止不苛以八亦不縱
以出讞者平焉是時光祿崔卿之子忿殺隣婦其子故宰
相甥也時宰曲為避釋公謝不往見後迫之見公復謝曰
僕與相公均有法守光祿子罪抵死相公欲生之宰相易
法大亂道也僕守死不敢易嗣有富室袁氏姻聯鉅璫事
下法曹公實主理朝貴半為請託且行賂滿鉅萬公山岳

之操屹屹不移竟置於法一時朝論翕然歸之謂為直法
吏然其寓生於殺平反者多不可悉也其守保定郡為右
輔路當八衝兵衛雜糅錢穀瑣屑獄訟猥繁盜賊渙萃將
迎將迎贈送之紛沓承侍統馭之叢挫豪俠戚畹之武斷
漁獵凡人有不堪者公處之裕如若其抵徐某之罪而攘
奪之害革發魏東之姦而府庾之弊釐塞唐水之泛而沮
沒之患熄程邊運之役而轉輸之勞均嚴課試之方而科
第之才盛獎廉勤之吏而郡邑之政脩慎鄉飲之選而禮
讓之風醇表節孝之門而習俗之積振古所謂循良公蓋
庶幾也乃其平明之譽昌播中外癸巳之秋大同構變

朝命宗伯黃公戡撫黃請於上遴公與行公乃揚威布澤持法行權元惡就刑反側向化惟公為績既乃晉副浙臺公視事適臺員闕乃兼攝數事浙人素欽其譽吏慄慄不自存民則熙熙自慰也是可以觀政矣先時臺中申飭憲度率由舊章謂郡牧臺史先朝禮接有制凡庭參止長揖不屈膝今靡靡不自振矣今下復故一時列郡觀望可否公曰是何疑哉臺史郡牧均人臣也憲度具在余惟執禮以遇越分媚人吾耻為之徑揖不顧臺史陽加獎善陰排於同列群議煽沸鬱而未揚乃闕其去郡攜接絲髮交閔攻擊銓衡軒輕擬議居閑而自樹者顧多賞譽公乃

擲不理校浩然賦歸一切仕進弃不橫念買田葺廬讀書
教子彈棊賦詩飲酒自放漠漠與世不相閔也卒之日鄉
論士論皆惜其閔擴之才而尚其長厚之風云公性率易
與物無忤中操堅毅不以勢搖不以利奪蓋有人所難能
者少孤事母克孝事兄克悌處宗黨嚴而仁與朋友交信
而急難為文章華實相副凡所論說吐露肝臆故君子與
其為先進儔類也右按閻氏之先為京兆萬年人至唐右
相立本葬興平馬嵬坡始家其地元季避亂入蜀國初
諱昌者始復業昌生遵道遵道生贈順天府尹秉直秉直
生通以人材授南京刑部司獄贈順天府尹通生鐸景泰

辛未進士歷官府尹出守衢州仕終浙江右布政使鐸生
璘以蔭補大學生授鴻臚寺序班贈刑部河南司主事配
安人大興趙氏通政某之女生公兄弟四人伯瀚仲滄季
浙公其少也始配河州王氏僉事經之女贈安人生子樓
俱先公卒繼配西安王氏百戶經之女封安人生子枰取
馮氏工部員外郎應元之女女一歸某之子庚其少子橋
者則其庶李出也嗟嗟北泉少同我學長同我仕老同我
隱抑又絆以昏姻情軫骨肉嫵婉之好恒注於心唱和之
音不忘於耳乃忽棄我遐逝某非木石其悲何如敬從治
命製為銘曰有唐華裔有明巨宗振振君子矯矯人龍不

瑕如玉有貞若松用也未究譽也靡窮升城之西漕渠之
東抱陽負陰土腴草豐爰著爰
元吉令終嗟嗟北泉於
此焉封

浙江圖書館



浙 江 圖 書 館

中憲大夫雲南按察司副使楊西渠公墓誌銘

王慎中撰

西渠楊君名逢春字仁甫泉州同安人予舉乙酉榜同年
友也由己丑進士授杭州府仁和縣令父喪未至官服除
為蘇州府崑山徵入授南京道御史出為廣東按察司僉
事母喪去職起復僉事為四川按察司擢湖南布政司叅
議積資二十四年始為按察司副使未至雲南卒於叅議
之官舍年五十六卒之二年為嘉靖乙卯十二月十六日
塋於邑之某山君居官竭心奉職凡職所當事事悉力從
之事有犯忤人所縮首善避及勞險不可必濟偷則苟安

君必引為己責曰職所有事也直前勇赴不反顧沮悔常
為巧者所目君初不知久之或知亦不變也曰使衆人智
而我為愚不亦可乎且使吾不愚則意貳力分於事事亦
不能如其職矣是吾正有賴於愚也又烏用去之崑山稱
富縣前令多以富自沒於富而諸獻遺權力猶
不敢裁罷君曰費人之財以買聲市恩而詭於不貪人之
費斯孰孰其咎一切罷之其政寬民急吏賦籍獄牒胥史
不得竄手戶受賊重輕獄當決縱榜亦出無不愜服不求
吏知權不在左右也撫按異意條教難遵君据理䟽正當
以理為君奪舊令最以故方伯慈谿楊子器公為賢至是

有前後揚之稱蓋以君繼方伯公也江南北諸郡邑以歲
時餽留臺為常君八臺餽不敢至曰是嘗為崑山盡罷諸
獻遺者不可溷也巡視江南北倉庾汰黜庸貪風米振竦
所部廣屬吏滋多人人如君臨之在廣東分巡嶺南道疆
界遐曠徃種蕃育其中數為民患故嶺南兼有兵戎之寄
法弛日久將玩卒惰賊白日剽通道行旅梗塞相為蒙蔽
以苟歲月而已君首舉網維責郡縣以修政息民之要然
後易置將領選卒訓練指授方畧自是賊發輒得野聚荒
村開戶而睡矣在蜀領璽書專以鹽屯為職最號煩劇利
源所在豪右穴之君綜刷成額按籍考要年侵月虧瞭然

可見偽巧無所篩課八日進時叙州戎縣都蠻畔殺略吏
民長寧戎珙一路邊無居人監司相顧莫肯發口君獨抗
言且設禦取之策撫按相與謀非揚僉事不能辦此會檄
以都蠻之役委君君至益用耳目知蠻敢為不靖由屢撫
養其驕桀之性非盡勦之後益不可為度險阨分兵四路
約期進勦君復計蠻素以撫徂我若因而誘之宜必我徂
得之易也陽撫其四鄉而以勦二鄉為師名果得四鄉最
傑者四十人以來盡殲之用是兵入有功俘斬以千計湖
廣分部潭邵之間戶多逃亡客戶据其田逋稅猶責主戶
之存者故亡益多而逋殆不可校君為法使稅常附田以

行田與稅不得相失而互為有無也平賦均役通滯節冗
事集而令不煩其在職獨又復因暇日興起禮教訓勵生
徒士奮於學者彬彬然盛矣所至盡心於職大較如此故
其以憂去嶺南以遷官去蜀民皆若失所怙相與泣曰從
蠻復苦我矣其卒於湖南民走哭相踵不絕喪歸罷市舉
聲以過喪出境乃已居世不顯曾祖某父某皆以謹朴守
家君貴贈父為御史封母某氏為太孺人君天性孝友與
弟逢陽終身不異財守官廉約所餘俸悉畀逢陽為家逢
陽亦不敢私君之內子封孺人洪氏能無吝情一門友恭
雍如也於交游薦久而不忘欽欽在鄉閭間敬老字幼不

以貴倨有人所不能及也君在崑山邑有故相當國子弟
僮奴暴里中君逮置之法移書都下懇惻侃切言以德為
愛之意故相報謝暴者終君之任益戢嘗欲奉其父祀于
鄉賢祠邑子論有異同君持之故相滋不悅然未嘗敢短
君也為御史值 東宮備官寮時相引置私人物論大譁
君首彈之相權寵方盛莫敢齒及上覽君疏加納為易置
所引用者時相氣大沮欲中君以事而有所畏遂以僉事
出君臺中在嶺南韶州守倚故相大為奸利不法事總制
撫臣憚相權益優異之君白發其奸撫臣搖手君曰坐視
民患不除不能一日安於位除患而以禍去心所安也撫

臣內惡其言而奪於君之法韶守竟不免此皆其悉力於
職人以為愚而君嘉為之者其在蜀都蠻之叛非君職也
直以憤在職者偷事病民遂以身任之功成而賞不及反
以得謗久而後白尤人所為愚者也然君仕雖不速化而
正論常歸之使昌其年仕終當違視巧者遲速之聞耳而
遽止於此豈非命也夫子二人長士選娶臨海尹林大樑
之女次幼聘某女嫁某銘曰淑之湯湯下流長兮魂飛於
上儂昭揚兮歸旒翻翻有攀傷兮復魄故丘固且良兮維
吳興蜀嶺之陽兮山阻水逗莽異鄉兮尸祝報享酒牲芳
兮胡必茲丘歸斯藏兮詩于墓門荅精爽兮



浙江圖書館

明故廣東按察司副使嶺泉胡君墓誌銘

羅洪先

君諱永成字思貞號嶺泉吉之安福人嘉靖己丑進士授
涇縣知縣能其官四年用薦者入為刑部某司主事斷張
延齡獄忤旨例謫和州同知稍遷徽州府同知南雄知府
自為州郡而能益著復用薦擢廣東按察司副使整飭瓊
崖兵備卒于官年四十有九士大夫聞者莫不惜其才而
卒之日又無疾於是聞者又莫不衰其促余與君同年舉
進士而生於同郡是年同郡舉進士者十有一人先卒者
五君於五人稍後矣而又以能顯余因以得久交心雅愛
之余待罪歸田君嘗再訪于家所言侃侃多古人風節不

欲以世俗瑣猥事入口故余於其卒也不獨惜其才而憐其志不獨悲其促而疑其故又有異於他人之聞烏既踰年其子宏宗來請銘余既雅慕而哀憐之何忍辭然君在州郡余以告去其政事不盡聞大要君之政事必欲其是非斷於已而不能以致譽徇乎人已以為是雖貴宦尊官沮之不止也已以為非雖甘言游說強之不從也以是其能著而人亦多忤涇巖邑也民喜訟匿不受捕君為條教使民知令意不在根株有枉抑來自言即可得理於是訟者無敢嚚傲乂之旁邑求歸平建平王貫五者坐逆黨多誣逮積十餘年不能決至是獲釋者五人君之治獄主於

不誣而已然頑梗自遠盜賊簡息當是時儉菴梁公為司
徒奏畿內儲蓄多不及數恐一旦緩急無所仰下議郡縣
行之郡縣多虛文相給獨涇以君政廩庾皆實民所隱稅
既不得幸而歲漕所屯厰舍舊在邑者更置灣汜水陸交
便比君滿考再至涇歲果大饑施給有序涇民得以不困
嘗署其廩曰積之者誰散之者誰知我者此罪我者此其
為遠慮又若此去之日民擁道挽之不得泣留其衣服以
別入刑部為司寇漁石唐公所知主視諸司奏牘諸司有
大疑獄及當矜恕者屬令代署奏牘上皆得 俞旨及謫
和州會章聖皇太后梓宮南祔所過州郡多以供調弗嚴

得罪至和州官吏無受贖者然自和州至為徽州以副倅
得不事事時時與儒生學士遊儒生學士聞君在涇崇獎
文學頌其說者射科輒中於是從而學易者甚衆南雄當
江嶺襟喉天順間於太平橋權稅助軍餉而郡司其管即
不得人往往有所沒入前守同邑劉公實獨以節介鳴於
時時人號曰鐵板君至嘆曰吾縱不能為劉鐵板將不得
為木板乎既以權委他倅李一易人以防蠹漁得請因著
為例而民間稅額歲虧者復分遣所屬覈之會議者言小
明路事君復建六難之說始庾嶺未開時道入東河抵烏
涇出信豐至今商鹽用之而射利者欲從西河入南安小

明君之六難說曰塞鳥逕路廢小民業一西河在下流移
橋關費鉅二減鹽牙稅勢湏增民料價三新道險僻必多
增巡徼四開道撤江嶺藩籬五西河淺小水利不便六議
者誑其說事竟寢自六難出而君益多忤然人亦更以此
多君瓊崖之役本以備黎君則曰凡病吾民者即黎也何
黎之責不此之詔而但欲備黎黎將我有辭矣且黎亦人
也使吾有以處之被食其土烏庸絕乎於是籍墨吏之效
尤與彊宗之怙勢者必抵于法瓊限海外往時官其地者
自以遠鄉井入絕域懼其有他又多貪竒香珠翠犀貝諸
貨下為籠罩計不可滿欲於法故無所操斷君斷斷獨不

為身計民始知有官刑而名首如那紅狗黃猪次第且俱
送款君方以效職自喜嘗獨臥署齋晨起衣冠將視事忽
手足逆冷不能舉家人請召醫猶曰毋擅出我門戶語畢
卒君既卒無能明其為何疾者悲夫安成胡氏出南唐長
史滙滙十八世為仲瞻明初以粟二千石救旌義民義
民生宜昇是為君高祖曾祖萬通祖敬父熹熹任俠酷類
就民君未弱冠舉鄉試而家世固且非寒約矣然平生自
恃食使令無少奢僭處家孝友而恩及群下聞甘泉陽明
鷄先生之學皆能不逆其說居常以其說訓子弟然則能
熹官而卒以死者其有自哉君生弘治丁巳三月二日卒

以靖乙巳八月二十二日涇懸縣滿考封其父文林郎涇
知縣母劉氏前室李氏皆贈孺人繼母李氏 周氏皆
孺人子宏宗為郡諸生以丙午十月十一日塋里中上
元山而以稚愛哀憐之故為之銘者洪先也銘曰 謂君
弗宜時兮在郡邑則治之謂時弗君知兮去郡邑則祠之
生必有死海南奚疑死如有傳奚以君悲

浙江



浙江圖書館

江西提學副使金公墓誌銘

洪朝選撰

公名賁享字汝白而清明醇夷剛介端重得於天稟自少
即知為學絕去外慕不以富貴利達動心台竟僻山海風
氣完固與他州郡不類自國朝來踵有名人其氣節視古
夷齊逢于之流先生生其地故亦以名行節操自砥一日
偕其同郡友應公大猷遊南雍遇海寧許杞山為同舍生
論學豁然大悟乃知向之所學者名檢爾自嘆曰是豈名
檢足書乎朝夕過從以講論咨叩為事杞山者許公相鄉
也以學行著聞於浙中先生既知學門大指於是毅然以

聖人為必可學動止作息語默酬應務與學俱嘗愛橫渠
一時放下則一時德性有懈初學之始當以心為嚴師及
伊川整齊嚴肅則心便一之語日用工夫莊敬嚴密言動
有紀細過必錄諸儒論學方要有籍以求至夫聖人之地
蓋踐履既篤德性堅定矣而先生之心不自以為足也及
留曹謁告屏居數月取明道延平二先生書反覆潛玩若
有會於心為一夕夢明道伊川三先生在坐先生詣前拱
揖伊川起謂曰家兄最好工夫覺而大悟乃知前日工夫
用意過苦責効太迫反入於銳進助長之病其於澄然真
體似未有悟入處由是為學一以明道為宗嘿坐澄心體

認天理一意涵養體認勿忘勿助久之端倪呈露靈明畢
照隨遇順應不倚色相不加襯貼真趣日融內外合一務
持者裕荏敬者舒於明道所謂不須防檢不須窮索延平
所謂洒然冰解凍釋處不覺已優入之矣教人而必先之
端已範物由身以連諸言其所建立章程施置規模大抵
主於崇禮教悖俗尚端蒙養不為彌文末務而推明先賢
之道以繼前哲表章儒先之言以淑後人意慤惻如也在
揚舉行四禮修釋奠儀新樂舞斥大僚之不祀賢祠者黜
無行士之黃緣接例者在貴陽未久而遐邇丕變在閩發
明晦菴之學本之延平章龜山明道具有本末端序其

始人士習溺舊聞尚未之信先生既闡道南書院以崇祀
五先生復記其說於書院之碑刻五先生之行述語錄載
於道南錄中由是閩士始知晦菴之學師承之所自也明
道嘗以敬而無失發明喜怒哀樂未發之中而龜山之教
亦令驗道心於未發厥後豫章延平晦菴畫一相授迭衍
以光又因羅李二先生之從祀疏於朝曰李侗宋儒朱熹
之師也侗學于羅從彥從彥學于楊時時學于程顥顥嘗
送時南歸為人曰吾道南矣顥豈輕許可者而獨以此稱
時是時所傳于顥而以授從彥者即濂洛諸儒所以繼孔
孟之統者也又曰五先生氣象稱述於門人弟子者如明

道之表裏洞徹莫見瑕疵如龜山之終日不言嗒然而飲
人以和如豫章之與人並立而使人化如春風發物如延
平之冰壺秋月莹徹無瑕如晦菴之心度澄朗莹無查滓
特為表章叅驗考證源流統緒灼有明徵又擇其志向尤
異士子聚之養正書院相與推明洛閩微旨圖在江右優選
屬郡志行之士群之白鹿書院中親與講論聖賢為學次
第明濂溪過化之由寃鵝湖同異之旨所以開發成就之
者極其懇切士人多所嚮風而惜其不久也其他居刑曹
會臬憲多用人倫良心斷獄不專專為文吏法家事而於
貪吏豪民之虐民敗宗者則痛裁以法一不少貸也先生

天性至孝自筮仕至休致未嘗離二親側事繼母陳安人
極其誠敬年五十丁陳安人憂執喪愈謹三年不入私室
吊客待蔬饌殯葬不用浮屠傳家以忠孝勤儉教家以冠
婚喪祭表祖先迷失之墓立宗人會祀之祠置祭田嚴祀
事修譜牒纂世德黎民興起率子姪謁家廟遇祭祀雖嚴
冬甚寒必沐浴齋戒至老不異處暗室如公廷對妻孥如
賓客薄田數十畝僅給饘粥皆先世所遺而終身未嘗輕
受人一介之餽衣服冠裳必遵古制起居食息具有常度
雖造次顛沛未嘗少變於平時也雖可怒可愕未嘗少萌
於形色也居鄉非大禮足跡不入公門而於民間利病先

哲道脉攸攸盡心如辛丑海潮之變言于郡縣所全活者
以萬數晚歲尤喜讀易因書其所自得為學易記其於大
學中庸亦有成書至論晦菴之學原其三變象山之學明
其非禪則皆近世儒者之所未及於本朝諸儒獨推尊白
沙之學以為合於聖學為之擇其要語以示學者若先生
者可謂道德之完人儒林之先覺者也有學易記學書記
道南錄大學中庸議象山白沙要語台學源流文集臨海
縣志等書皆傳於世先生生於成化癸卯距所卒之年月
日享年八十二臨終戒子弟嚴終事一如家禮無一語他
及高祖諱福德國初以才薦授將仕郎曾祖恩祖鉞俱有

名德號梧窓而封南京刑部主事諱然者則先生之父也
母朱氏繼母陳氏皆以先生貴贈安人配張氏封安人眉
壽淑德與先生媿以二子貴加封恭人子男四人立愛今
為衡州府知府居官潔已愛民衡人記之立敬今為福建
提學副使疏羅李從祀于朝雖未報允而君子以為能繼
先生之志聞先生疾遽告致仕以歸竟得侍湯藥以奉先
生終君子賢之立相南京武選郎中先卒皆張恭人出昆
季皆能傳先生之學其行誼皆不忝於家門教法立常府
學生側室出女三人長適叅政趙弘淵子揖即與先生為
講易會者也次適和州林公元秩子櫛次適陳承南皆庠

生孫男十八人錫祚錫類錫山錫爵錫旻錫川錫跖錫周
錫介錫襄錫韓錫祐錫黼錫申錫由錫祿錫痛錫命祚鄉
貢士類旻川周俱庠生孫女十四人曾孫男四人女八人
立愛等將以某年某月某日奉先生柩塋于某山之原以
同邑廣西左布政使王君宗沐之狀來請銘銘曰昔胡文
定公有言龜山所見在中庸自明道所授中庸何言而明
道龜山以之相授受也豈不曰喜怒哀樂未發謂之中乎
夫中何形影而未發之前又何可捉摸也淺言之不為鑿
空之虛見深言之不為象罔之妙論乎而何以為道統之
傳之宗也噫子思子開示蘊奧之意深矣厥後延乎先生

論中庸曰聖門之傳是書所以開悟後學無遺策矣然所謂喜怒哀樂未發謂之中者又一篇之指要也其得於一脉相傳者如此猗為先生崛起詞起玩味潛心獨紹斯旨
在宋潛溪嘗稱晦菴傳學江南台盛莫匹存蔣道林稱台
之學至於先生與洛合一嗚呼有欲觀於斯道之脉盍觀
於明道龜山中庸之傳與夫先生之所自得作此銘詩以
垂永刻

山東提學副使陸公列傳

張時徹撰


陸鉞字舉之副使偁季子甫能言母楊淑人命之以字百
試不爽稍長慧智開發一日輒數行下為舉業文精恪典
雅大為時輩所宗己卯舉于鄉庚辰會試中式辛巳廷對
擢甲科第二拜翰林編脩讀書中祕益銳志問學盡覽經
史百家言儕輩素以才名著皆誦下之尤砥礪名節以古
人自期待時議禮諸臣故傾心於鉞欲引以為重鉞卒不
應其人以為少己遂啣之會預修武皇實錄成進脩撰已
而大禮告成議禮者秉樞修宿憾遂出為湖廣按察司僉

事職江防時其署新設除戎禦侮簿書文牒皆創為之而
飾叙振刷憲度井井諸僚竊相與議曰嗟陸君老吏殆不
如矣已而稍遷江西叅議職司糧儲輒能釐革宿弊盡徵
諸所逋負又酌諸郡之贏縮驗物產之登耗而損益上下
之人皆以為便已又稍遷山東按察副使職專學校自言
曰尸祝代庖自今得少展其志乎乃明章程嚴品式正文
體其雕蟲靡麗則黜抑之期不詭於大道所至敦尚孝弟
分別義利才雋而行篤者引之若腑肺士習為之丕變他
如斥異端之祠以崇祀先哲乃其教之大者山東舊無通
志則喟然嘆曰海岱山川之宗也聖賢人物之望也六經

文章之祖也惟茲一方之志而天下古今之事備焉言當
殫茲役矣遂考古諏今補遺正訛窮日夕不懈此踰年志
成而鉞則病矣遂上疏乞骸骨其畧曰臣自入東土荐罹
愍難一年而喪女二年而喪妻雙柩在次幼子在抱又不
幸有狗馬之疾願徼洪造敢丐餘生疏入不報遂卒鉞性
資溫厚和而不流口未嘗言人之短而剛大之氣侃侃不
阿犯履啜之戒曾無回忌卒坎壈以沒云



浙江圖書館





浙江圖書館



浙江圖書館



浙江圖書館

浙江圖書館善本


甲登記號：006680

一九 年 月 日



浙江圖書館




















colorchecker CLASSIC



xrite



colorchecker CLASSIC



x-rite

100mm